

Nork ez du lorerik entzun?

I

Nork ez du lorerik entzun?
Zein apain, zer edertasun
ze ondo geratzen zaizun!
“Zureak ere nahiko nituzke...”
zuk ere lorez erantzun
naizenaren harrotasun
hortan berretsi nazazun
ea laguntzen didazun.



ALBERTO ELOSEGI

VI

Lepoarekin zer lana
honek ere zer esana
ziur emango didana!
Lepo gihartsu atletikoa
aspaldi da iragana
orain zintzilik darama
nire egoaren zama
a zer zakua daukana!

II

Lehenengo begiraldian
distira buru erdian
ile falta agerian.
Neure buruaz beste egiten
hasi ziren aspaldian.
Lehengo multzo ugarian
emigranteak abian
itultzekotan agian.

IV

Begietara begia
utzi du hor ere ia
denborak bere egia.
Ziren hartatik gaur direnera
alde nabarmenegia:
lehengo distira erdia
ez dutela alegia
itzali zait aurpegia.

VII

Zail da begiak ixtea,
zail lepoari eustea,
zail berriz ilez janzteia,
zail sudurrari gorria kendu
eta argalaraztea,
beraz, loreen eskea
hobe albora uztea
lehen entzunak sinistea!

III

Goitik zenbat ile jausi
bekainak hainbeste hazi
bihurtu dira bi sasi.
Denborarekin beltzen artean
ile zuriak nahasi
lehenaz gain, luzatzen hasi
eta jada dira kasi
begiradaren orrazi.

V

Sudurrak denen irria
nahi gabe erakarria
hain dago barregarria...
Zain gorritz bete eta bikoiztu
egin da bere neurria
zalantzan nago jarria
zer den, irudi berria
ala alarma gorria?

VIII

Ustekoz galai dotore
entzun arren mila lore
eman behar dut amore
ez didazunez egiten ustez
merezi hainbat ohore
ez begiratzea hobe
eta giltzapean gorde
agur ispilu traidore!

DOINUA: “Ai hori begi ederra”.

IX. Balendin Enbeita bertso paper sariketako irabazlea.



Bidali zure sortak bertsoak@argia.com helbidera. Aukeratuak orri honetan argitaratuko ditugu.